

## 2 Yohana Yohana ya SEME shuun wo wemu ka ge

*Jagɔ mu we SEME we d'a tun we?*

«Cee wemu naha k'a bulo ge, wee ni wu nagoo»  
na tudunmɔɔ Yohana ya we SEME we naha tii. Lee  
kɔri ne Egilizi wa ni wu n'a daa fee.

*We SEME we kakana nunɔ*

Yohana ya Egilizi wu luu waha na pu kori yaha  
can wu ni, pu da naari taanɲeege ni, pu da puyɛ  
kaseri karamɔgɔ-kafinejuu pu na.

*SEME wu kafila nɔgbɔɔ*

**2 Yohana 1-3** Yohana fɔ mujuu.

**2 Yohana 4-6** Na naari can ni taanɲeege ni.

**2 Yohana 7-11** Yohana ya pu kaala ni karamɔgɔ-  
kafinejuu pu kaa ni.

**2 Yohana 12-13** Jomɔ pu taxɔgɔ.

*Yohana fɔ mujuu*

<sup>1</sup> Ne wemu wu ne egilizi nɔhɔle ge, ne wa we SEME  
we ka. Na ceboroshɔ wemu naha Kile ya bulo ge,  
wee ni wu nagoo mu n'a wu tunni. Yee kaa ya dan  
ne ni can can na. Ga ne ye be we, sipyii piimu beeri  
pu ne Kile wo can wu na ge, yee kaa ya dan pee  
beeri ni. <sup>2</sup> Yee kaa ya dan wɛe ni, bani Kile wo can  
wu wa wɛe funyɔ ni, wee di wa da gori yaha be  
gbee wu funyɔ ni.

<sup>3</sup> Ayiwa, To Kile ni wu Ja Yesu Kirisa wu niime, ni saama, ni japiɲe kan wu mu, kɔnhɔ wu gori yaha wu can we, ni wu taanɲeege ki ni.

*Na jaari can ni taanɲeege ni*

<sup>4</sup> Ne mu nagoo pii ja pee ya jaari can koo li ni, ba To Kile ya yi jo jogana lemu na we. Lee kunni ya ne funɲɔ taan xuuni. <sup>5</sup> Lee be na na ceboroshɔ, n'a da jomɛefonɔ jo ma mu we. Ga jomɛɛ le n'a da jo ma mu ge, lee ne Kile ya jomɛɛ lemu kan wu mu fo taashiine li ni ge, na wu taan ni wuye ni. <sup>6</sup> Nɔmehɛɛ kiimu Kile ya jo ge, wu ba kee koro jaari, lee li ne taanɲeege ke. Lee jomɛɛ le l'a jo yee mu fo taashiine li ni, na y'a taanɲeege koro jaari.

<sup>7</sup> Sipyii piinɲevɛɛ niɲehɛmɛɛ pu wa koɲɔ ke na nime, pu wa kabaya ye beeri na. Pee ya ta sɔɔ li na na Yesu Kirisa ya pye sipya, na ba se ke koɲɔ ke na we. Pee sipyii pii pu ne sipyii piinɲevɛɛ pee, ni Kirisa wo peen pee. <sup>8</sup> Lee wuu na y'a yiye kaseri, kɔnhɔ yi ganha bu buun yi labye wu kuduun ni we, ga y'i wu kuduun wu beeri ta. <sup>9</sup> Yi li ce na sipya beeri wu ne wu ya kori yaha Yesu Kirisa wo kalaa we na-e ge, ga fo na wuye pyaa jidaan fara wu na ge, weefɔɔ ne Kile wo kariɲeege ki ni bada we. Ga sipya wemu bu gori yaha Yesu Kirisa wo kalaa wu na, weefɔɔ na bye kariɲeege ni ni To Kile, ni wu Ja wu be ni. <sup>10</sup> Sipya beeri w'a pa yi mu ni kalaa watii ni wemu ne Yesu Kirisa wo kalaa we-e ge, yi ganha bu da weefɔɔ yaha wu je yi puga we. Yi ganha bu da ali fɔ be seɛge taan wufɔɔ na we. <sup>11</sup> Bani mu wemu bu fɔ be seɛge taan wu na, l'a pye kanna mu w'a wɔ ni wu ni wu kapyege niguunɔɔ ki na.

*Jomɔ pu taxɔɔ*

<sup>12</sup> Keree niɲehɛɲɛɛ wa nɛ mu na jo yee mu, ga na funɲɔ wa di kee beɛri pye sɛmɛ di dun yi mu wɛ. N'a giin di she yi yiri wù she baari wùye ɲii na, kɔnhɔ wù fundanga ki ɲɔ di fa.

<sup>13</sup> Ayiwa, Kile ya ma ceboroshɔ wemu be ɲaha bulo naha ge, wee be wo nagoo ya ma shaari.

**KARINĒĒGE NŌMĒE NIVONŌ**  
**New Testament and Shorter Old Testament in**  
**Senoufo, Mamara**

copyright © 2014 Wycliffe Bible Translators, Inc.

Language: Mamara S noufo (S noufo, Mamara)

Translation by: Wycliffe Bible Translators

Contributor: Wycliffe Bible Translators, Inc.

  2014-08-10, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 21 Feb 2024 from source files dated 29 Jan 2022

85728ed7-78f8-58e8-8967-0e976c0c2423